

## Morning Regional Dogri News Bulletin, 23<sup>rd</sup> April 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

### Headlines

1. लोकसभा चुनां दे दुए गेड़ लेई प्रचार अभियान जोरें-शोरें जारी। बक्ख-बक्ख पार्टिं दे सियासी बड्डे-बड्डे लीडर रैलियां करियै मतदाताएं गी अपने बक्खै च करने दी पूरी कोश्ट करा करदे न।
2. उपराज्यपाल मनोज सिन्हा होरें री अमरनाथ जी श्राईन बोर्ड दफ्तर ते यात्री निवास दा मौके पर जाइयै निरीक्षण कीता।
3. पुलस महानिदेशक आर.आर.स्वैन होरें चुनां पूरी चाल्ली सुरक्षत ते बवस्था आले ढंगै सिर तोड़ चाढ़ना जकीनी बनाने पर जोर दित्ता ऐ।
4. राजौरी जिले च बेपंछानु आतंकवादिं इक सैनिक दे भ्राह् दी गोली मारियै हत्या करी दित्ती ऐ।

<><><><><><>

### Campaign

आम चुनां दे दुए गेड़ लेई चुनां प्रचार लेई हुन अज्ज ते कल दा दिन गै बचे दा ऐ। सियासी पार्टियां अपने मेदवारें दे हक्क च रैलियां ते रोड शो करियै मतदाताएं गी अपने पाससै खिच्चने दे सब्बै जतन करा करदियां न। जम्मू लोकसभा हल्के च दुए गेड़ तैहत औंदे शुक्रवारें वोट पाए जाने न। कल संजा 6 बजे चुनां प्रचार खत्म होइ जाना ऐ। 22 मेदवार मकाबले च खड़ोते दे न, मुख् मकाबला बीजेपी दे जुगल किशोर शर्मा ते कांग्रेस दे रमण भल्ला हुंदे बश्कार ऐं इस लोकसभा हल्के च 17 लक्ख कोला मते मतदाता न। एह हल्का चऊं जिलें ते 18 विधानसभा हल्के च फेले दा ऐ। उधमपुर लोकसभा हल्के थमां कांग्रेस दे मेदवार चौधरी लाल सिंह होरें राजौरी ते सियासी च रमण भला हुंदे समर्थन च चुनां प्रचार कीता। महिला कांग्रेस दियां प्रधान अल्का लांबा होर अज्ज जम्मू च चुनां प्रचार करगंन। केन्द्री मंत्री ते उधमपुर हल्के थमां बीजेपी पार्टी दे मेदवार डॉ. जितेन्द्र सिंह ते होर लीडर जम्मू च रैलियां करा करदे न। एहदे कोला पैहले कांग्रेस दे लीडर सचिन पायलट कांग्रेस लेई ते गृहमंत्री अमित शाह होर बीजेपी गित्तै इस गेड़ लेई चुनां प्रचार करी चुके दे न।

<><><><><><>

## Srinagar Nomination

लोकसभा चुनाव 2024 तैहत श्रीनगर पार्लिमानी हल्के लेई कल दरुं मेदवारें अपने नामांकन भरचे दाखल कराए। इस लोकसभा सीट पर 13 मई गी वोट पाए जाने न। श्रीनगर पार्लिमानी हल्के दे रिटर्निंग अफसर दे दफतर च शीबान अशाई ते निसार अहमद अंहगार नां दे मेदवारें अपने नामांकन भरचे दाखल कराए। एहू दोवै आजाद मेदवार न। श्रीनगर पार्लिमानी हल्के लेई नामांकन भरचे दाखल कराने दी खीरी तरीक 25 अप्रैल ऐ।

<><><><><><>

## Amit Shah

केन्द्री गृहमंत्री अमित शाह होरें कांग्रेस दे लीडर पी.चिदम्बरम हुंदे उस ब्यानै दी सख्त नुक्ताचीनी कीती ऐ जेहदे च उनें सत्ता च औने मगरा नागरिक संशोधन कनून, भारतीय नागरिक सुरक्षा संहिता ते भारतीय साक्षय संहिता हटाने दी गल्ल आक्खी ही। इक ब्यानै च अमित शाह होरें आक्खेआ जे नां कदे कांग्रेस सत्ता च औग ते नां गै लोकें दी भलाई-बेह्तरी आस्तै बने दे एह कनून हटाई सकोग। उनें आक्खेआ जे इनें कनूनें कन्नै मुल्खै दे आम लोकें दे हित्तें दी राक्खी होंदी ऐ ते ओ बाअख्खेयार बनदे न।

<><><><><><>

## Congress ECI

राजस्थान च इक चुनाव रैली च प्रधानमंत्री ते बीजेपी दे वरिष्ठ नेता नरेन्द्र मोदी हुंदे आस्सेआ कथित तौरा पर इक विशेष समुदाय खलाफ कीती गेदी एतराज जोग टिप्पणी गी लेइयै कांग्रेस नै कल निर्वाचन आयोग च शकैत कीती ऐ। कांग्रेस दे वरिष्ठ लीडर अभिषेक मनु सिंघवी हुंदी अगुवाई च पार्टी दा इक प्रतिनिधिमंडल नमीं दिल्ली च निर्वाचन आयोग दे दफतर पुज्जा। आयोग दे अफसरें कन्नै गल्लबात दे बाद सिंघवी होरें मीडिया गी दस्सेआ जे उनें गुजरात च केई थाहरें पर धर्म गी लेइयै लाए गेदे इशतयारें दी आयोग अग्गे शकैत कीती ऐ। उनें आक्खेआ जे निर्वाचन आयोग अग्गे 17 शकैतां उनें कीतियां न।

<><><><><><>

## LG-SASB

उपराज्यपाल मनोज सिन्हा होरें कल रीनगर दे पंथा चौक थाहर श्री अमरनाथ जी श्राईन बोर्ड दे यात्री निवास ते दफतर दी प्रगति दा जायजा लैता। उपराज्यपाल होरें बड़ी मती प्रतिष्ठा आली इस परियोजना आली थाहर पर मुआइना करने लेई एह दौरा लाया। उनें अधिकारिणं गी निर्माण कम्में च तेजी आनने दे निर्देश दित्ते तां जे कम्म तैह समें कोला पैहले पूरा करी लैता जा।

<><><><><><>

## Hanuman Jayanti

मुल्खै दे होरने हिस्सें आला लेखा जम्मू कश्मीर च बी अज्ज श्री हनुमान जयंति बड़ी मती श्रद्धा ते उत्साह कन्ने मनाई जा'रदी ऐ। प्रभुश्री राम हुंदे भगत दे रूपै च जाने जंदे, बजरंगबली जिनेंगी अंजनी पुत्र, केसरी नंदन, वानर देवता ते पवन पुत्र बी आक्खेआ जंदा ऐ, हुंदे जनम ध्याड़े दे रूपै च एह ध्यार हिंदू पंचाग दे साब्बै चैत्र म्हीने दे शुक्ल पक्ख दी पुन्नेआ गी मनाया जंदा ऐ। इस सिलसिले च जम्मू च बी सब्बने राम ते हनुमान मंदरे च विशेष पूजा अर्चना, हवन यज्ञ ते लंगरें दा सरिस्ता कीता गेदा ऐ। हनुमान जी दे भगतें दा बडलै थमां गै मंदरे च औना जाना लग्गे दा ऐ।

<><><><><><>

## DGP

जम्मू कश्मीर दे पुलस महानिदेशक आर.आर.स्वैन होरें कल सुरक्षा बलें गी निर्देश दित्ता ऐ जे ओ इनें लोकसभा चुनाएं गी पूरी चाल्ली रमादनारी, सुरक्षत ते कामयाबी कन्ने तोड़ चाढ़ना जकीनी बनान। दक्खनी कश्मीर दे अनंतनाग जिले च सुरक्षा अधिकारिएं दी इक सांझी बैठक दी सदारत करदे होई डीजीपी होरें आक्खेआ जे टकोहदा करियै संवेदनशील इलाकें च जित्थें सुरक्षा चुनौतियां मतियां न, उत्थें मतदान केन्द्रें दी सुरक्षा निग्गर रखना जकीनी बनाया जा। इस बैठक दा मकसद चुनाएं लेई तैनात पुलस ते होरने सुरक्षा बलें दी तैआरिएं दी समीक्षा करना हा ते कन्ने औंदे मतदान गी पूरी चाल्ली सुरक्षत बनाने लेई आपसी सैह्योग ते तालमेल गी पक्का करना हा।

<><><><><><>

## Civilian Killed

राजौरी जिले दे थन्नामंडी उपजिला क्षेत्र हेठ पौंदे शहादरा शरीफ इलाके च जंदी रातीं किश बेपंछानू बंदूकधारिएं, जेहड़े शक्क ऐ जे आतंकवादी होई सकदे न, नै इक आदमी दी गोली मारियै हत्या करी दित्ती ऐ। आकाशवाणी दे जम्मू संवाददाता नै जानकारी दित्ती ऐ जे संदिग्ध आतंकवादिएं थन्नामंडी च शहादरा शरीफ कश कुंडा ग्रां च टेरीटोरियल आर्मी दे इक जवान दे घरै पर हमला बोलदे होई अन्नेवाह गोलीबारी कीती जेहदे च जवान दा 40एं ग'रें दा भ्राह् मोहम्मद रजाक, जेहड़ा जे समाज कल्याण मैहकमे च मलाजम हा, गंभीर तौरा पर घायल होई गेआ। उसी तुरत नेड़े दे अस्पताल पजाया गेआ जित्थें डाक्टरें उसी मोए दा आंदे दा घोषत करी दित्ता। तोआई पुलस ते फौज नै मिलियै इलाके गी घेरियै तुपाई अभियान शुरू कीते दा ऐ तां जे हमलावरें गी फगड़ेआ जाई सकै। खीरी जानकारी थहोने तगर अभियान जारी हा।

<><><><><><>

## Election-Heat Waves

चुनां कमीशन नै लोकसभा चुनाएं दे हर इक गेड़ कोला पैहले लूह चलने दे हालात दी निगरानी रखने लेई इक कार्यबल दा गठन कीता ऐ। इस कार्यबल च चुनां कमीशन, मौसम सरबंधी मैहकमे, आपदा प्रबंधन सरबंधी प्राधिकरण ते सेहत मंत्रालय दे अधिकारी शामिल न। एह कार्यबल मतदान कोला 5एं दिनें पैहले लूह चलने ते हव च नमी दे सरबंधे च जायजा लैग। कमीशनर मतदान केन्द्रें पर शाएवान लाने, पीने आले पानी, पक्खें ते होरने सहूलतें गी जकीनी बनाने लेई राज्य दे मुख् चुनां अधिकारिएं कन्नै इक बक्खरी मीटिंग लाग। तोआई मौसम सरबंधी मैहकमे नै चुनां कमीशनर गी जानकारी दित्ती ऐ जे 26 तरीक गी होने आले दुए गेड़ दे मतदान दे मौके पर गर्मी गी लेइयै कोई चैंता करने दी लोड़ नेई ऐ।

<><><><><><>

## CS-Employment

मुख् सचिव अटल डुल्लू होरें कल जम्मू कश्मीर दे रोजगार ते हूनर सरबंधी पोर्टल गी तैआर करने बारे होई दी प्रगति दा जायजा लैता। भास्कराचार्य राष्ट्रीय अंतरिक्ष सरबंधी कम्में ते भू सूचना विज्ञान संस्थान आस्सेआ एनआईसी ते सूचना टैक्नालोजी मैहकमे कन्नै रलियै एह पोर्टल तैआर कीता जा करदा ऐ। मुख् सचिव होरें एहदे बक्ख-बक्ख हिस्सें ते सेवाएं बारे जानकारी लैती। उनें आक्खेआ जे इस पोर्टल गी नोजवानें आस्सेआ कैरियर दे सरबंधा च बक्ख-बक्ख मौके दा आंकलन करने लेई इक थाहरा पर होने आली बवस्था दे तौर पर इस्तेमाल कीता जाना लोड़चदा ऐ।

<><><><><><>

## Home Voting

चुनां प्रक्रिया गी समावेशी ते एहदे च भागीदारी गी जकीनी बनाने लेई कल संजा जिले दे त्रऊं विधानसभा हल्के च वरिष्ठ नागरिकें ते दिव्यांग मतदाताएं रमानदारी कन्नै घरें मिमां वोट पाए। रामगढ़-69, रामगढ़ 71 ते सांबा-70 विधानसभा हल्के च बुर्जुग नागरिकें ते दिव्यांगें अपने घरें थमां मतदान कीता। आकाशवाणी दे जम्मू आले संवाददाता नै खबर दित्ती ऐ जे 514 मतदाताएं गी घरें थमां वोट पाने दी सहूलत देने लेई 49 टीमां बनाई गेदियां हियां। घरें थमां वोट पाने दी वैकल्पिक सहूलत दा इस्तेमाल करदे होई 514 मतदाताएं चा 498 मतदाताएं अपने वोट पाने आले अधिकार दी बरतून कीती। तोआई पोस्टल वोटिंग सेंटरें च पोस्टल बैलेट मतदान बी कामयाबी कन्नै कराया गेआ। बक्ख-बक्ख मैहकमे दे 136 मुलाजमें जिनें पोस्टल बैलेट मतदान दा विकल्प चुने दा हा, 78एं मुलाजमें 20 ते 21 अप्रैल गी इस सहूलत तैहत वोट पाया।



## **Elected Unopposed**

गुजरात दी सूरात लोकसभा सीट थमां बीजेपी दे मेदवार मुकेश दलाल निर-विरोध जित्ती गे न। इस सीट गिमां चुनां लड़ा करदे कांग्रेस दे मेदवार नीलेश कुम्भाणी हुंदी नामजदगी खारज होने जाने ते बाकी मेदवारें आस्सेआ अपना नां परताई लैने दे बाद जिला कलैक्टर ते रिटनिंग अफसर सौरळा पारधी नै मुकेश दलाल हुंदे निर-विरोध चुने जाने दी अधिकारिक घोषणा करी दित्ती ऐ।



